

Canghdajsiuq Mbanjcuengh Yunghe Cimmea Swnjcienz Gij Dinfwngz Siuqbaengznem

壮乡手艺人用针线传承壮族布贴绣技艺

□ Cinz Leij Lai Youjgvangh raiz Dahdingz hoiz

“Fan najdenz neix couh dwg yunghe doenghgi baengz nwnh baenz gok baenz gok neix doxgap nyib baenz, moix giz raizva cungj dwg gij dozanq conzdungj Bouxcuengh, gyoengqde daiqbiuq mizfuk habhoz.” Mboengq-neix, youq ndaw aending canjlanj “yisuz baengzgyoeb caeuq conzdungj—vunz • doxgaiq • gwndaenj” Gvangjsih Minzcuz Bozvuzgvangj, Vangz Bizyiz canghdajsiuq “ban 80” neix naihsim geigangj caeuq langhbaej gij dinfwngz siuqbaengznem Bouxcuengh hawj bouxhek yawj.

Doiq Vangz Bizyiz daeuj gangj, gij de gaemdawz haenx mbouj dandan dwg faenh dinfwngz conzdungj ndeu, engq dwg swnjcienz gij gyaenz daxmeh, youq ndaw lwe d vnz Mbanjcuengh laedoengh, simsoh cix ceiq ndaej hawj vunz simdoengh.

Baez Cim Baez Mae Cienzndenq Gij Raeuj Caencingz

Mbanjranz Vangz Bizyiz dieg-youq Baksack Si Lungzlinz Gak Cuz Swciyen Sahliz Yangh Ngancangz Cunh, haenx dwg aen mbanj Bouxcuengh conzdungj ndeu, hoeng youq ndaw geiqndaej seizlwngnyez Vangz Bizyiz, gij daegsack Bouxcuengh ndaw mbanj caen mbouj yienhda saekdi. “Samcaengzlaeuz” doenghgi buhvaq conzdungj mehmbwk Bouxcuengh ngoenznaengz daenj haenx caeux couh deng naenx youq daej loengx, gij dinfwngz dajsiuq Bouxcuengh hawj vunz hozhaenz gvaq haenx hix deng bouxcoz yawj baenz gij hong baeg vunz youh mbouj canh cienz dem lo.

Caenhguenj gij fungsug conzdungj menhmenh deng vunz lai lumz bae, hoeng cungj mizmbangj cingzgamj rag laeg goek maenh cingq laeglemx lienndaemh roengzbae. Seiz dahlwg okhaq, fan najdenz daxmeh vih de nyinhcaen yunghsim bwh ndei haenx dwg gaiq gyaqcaeng ceiq dijbaui, gij dozanq miz fuk baez cim baez cim nyib baenz haenx daiqbiuq gij hohfuk ceiq caensim. Youq mwh diuz sengmingh moq doekseng, aennda vunz ranzdaiq gag doenghfwngz nyib baenz haenx couh dwg gij dakbaengh ceiq unqnemq, ceiq maenhrem lwgnding lo.

Gij siuqbaengznem Bouxcuengh dwg gij dinfwngz seiz cauhguh aennda caeuq najdenz gingciengz yunghe haenx. Doenghbaez vunz lai ndaem faiq, dozfaiz, daemjbaengz, nyib guh buhvaq, aenvih diuzgen rwix aeuyungh bi ndeu engqlj geij bi cij guh ndaej baenz dauq buhvaq ndeu, ndigah daegbied insik baengz. Gij guhfap denjhingz siuqbaengznem Bouxcuengh

couh dwg yunghe gak cungj baengz nwnh daet guh buhvaq lw roengzdaeu haenx, ciuq gij dajsuenq boux-cauhguh, gyoeb nem baenz gak cungj dozanq, liuxle yunghe maesei dinghaed biengok nyib baenz najdenz doenghgi doxgaiq neix.

Mwh ndaej 13 bi, Vangz Bizyiz couh maij hwnj loengh cim loengh mae lo, baez miz seizgan couh bae bomq-yawj beixnuengx roxnaeuz vunzgeq ndaw mbanj siuq doxgaiq. Gij baengz nwnh bonjlaiz couh gig bingzciengz haenx youq ndaw fwngzmbaeu mehmbwk Bouxcuengh, caeuq gij siuq gyaqciq dox giethab, gyoebbaenz gij doxgaiq moq hawj vunz siengj mbouj daengz, miz le gij sengmingh yisuz gyaendei miz yinxdaeuz lo.

Dinfwngz Conzdungj Bungzdaengz Gij Yungyiemj Saetcienz

Hoeng, vunz dangdieg cix mbouj ngah cungj “gyaendei gyoebbaenz” neix, neix hawj Vangz Bizyiz roxnyinh doeknaiq caeuq youheiq. Daegbied dwg bi 2007 gonqlaeng, Yinznanz, Gveicouh doengh gizdieg neix miz vunz daeujdaengz Lungzlinz soucawx baengzdoj caeuq gij huqsiuq Bouxcuengh, bog baengzdoj ndeu dan sou 3 maenz ngaenz, dauq buhvaq Bouxcuengh ndeu cij gai ndaej song sam bak maenz ngaenz.

“Vunz ndaw mbanj cungj mbouj miz gij siengjap baujhoh gij doxgaiq fwngz guh neix, couh lumj gaiq mbawgyoij nei, baenz bog baenz bog gai okbae hix mbouj rox sim’in.” Mwhhaenx Vangz Bizyiz ngamqngamq baenzranz, miz goenggvand de haeucoengh, Vangz Bizyiz hainduq youq dangdieg soucomz gak cungj huqsiuq Bouxcuengh, lij saeqsim yo ndei dem.

Vangz Bizyiz youq Namzningz hai le aen bouq cienmonz gai gij huqsiuq Bouxcuengh fwngz guh ndeu gvaq, maqmuengh engq lai vunz ndaej youq henzgyawj ngonzyawj gij dinfwngz conzdungj Bouxcuengh. Gij cingzgvang yienhsaed caen mbouj ndei saekdi, cauhguh gij huqsiuq gawq sai seizgan youh dwgengz, hoeng gij vunz caencingq rox huq haenx mbouj miz geijlai, haujlai vunz ciengzseiz dwg cam geijlai cienz gvaqlaeng couh baenq ndang lizhai.

Youq mwh boux vunz ndeu genhciz guh gienh saeh ndeu, cungj yaek bungzdaengz seizgeiz liuh mbouj daengz. Bi 2010, Vangz Bizyiz itcig nyinhcaen yenzgiu gij dinfwngz siuqbaengznem Bouxcuengh neix yunghe le ca mbouj geijlai bi ndeu, gag boux dog cauhguh le fan najdenz daih’it yunghe baengz nwnh sam gok gyoeb siuq



▲ Vangz Bizyiz gangjgej gij dinfwngz dajsiuq hawj daeulwe dinea.

baenz ndeu, dajsuenq louz hawj daeglwg bonjfaenh. Fan najdenz gyaqciq neix cungqgyang youz 60 vengq baengz sam gok gyoebbaenz, moix vengq baengz gwnzde yunghe maesei siuq guh roxnaeuz yunghe baengz nwnh gyoebbaenz duzsip, duzmbaj, heujma doenghgi dozanq conzdungj Bouxcuengh neix.

Mwhhaenx Gvangjsih Minzcuz Bozvuzgvangj cingqngamj cwngcomz gak loih doxgaiq fwngz guh minzcuz vunznou, fan najdenz Vangz Bizyiz cauhguh neix aenvih dinfwngz ndei, vwnzva neihanz fungfouq deng bozvuzgvangj sourom, yienghneix Vangz Bizyiz hix baenz le bouxhek ciengzseiz daeuj bozvuzgvangj, ciengzseiz youq ndaw gak loih hozdung feihyiz baij gij dinfwngz siuqbaengznem Bouxcuengh hawj bouxhek yawj.

Cozbinj Ok Guek Cam-gya Canjlanj Saenqsim Saenqhwnj

Bi 2013 ndwen 1 ngoenz 8, ciengz yisuz canjlanj mingz heuh “bienq iq baenz hung: 25 boux cauhguh baengzgyoeb Meijgoz 21 sigij” ndeu youq Gvangjsih Bozvuzgvangj banh, gij doxgaiq canjlanj dwg lai fan najdenz baengzgyoeb conzdungj daj 18 aen couh Meijgoz daeuj haenx. Vangz Bizyiz lumz mbouj ndaej gij simcingz saenqdoengh seiz byaijhaeuj aending canjlanj nyinhcaen ngonzyawj yenzgiu gij dozanq raizva caeuq gij dinfwngz cauhguh ndawde haenx.

Vih gijmaz gij najdenz baengzgyoeb rog guek yienghhaenx deng vunz yawjnaek, engqlj deng dangguh gij huq yisuz daeujdaengz Cungguek canjlanj, gij najdenz baengzgyoeb raeuz bonjfaenh cix bungzdaengz gij yungyiemj saetcienz ne? Vangz Bizyiz gig saenqdoengh, engqgya giendingh gij saenqniemh swnjcienz gij dinfwngz siuqbaengznem Bouxcuengh, fatyiangz gij dinfwngz baengzgyoeb lo.

Bi 2017 ndwen 7, ndaej Gvangjsih Minzcuz Bozvuzgvangj iucingj, Vangz Bizyiz bae Sinhmwzsihgohcouh Meijgoz guh vwnzva canjyenj, gij doxgaiq riengz ndang ceiq dijbaui de haenx dwg 7 fan najdenz baengzgyoeb daezgonq bi ndeu dajveh, caemhcaiq caeuq mbangj vunzgeq ranznden caeuq vunzsug rox dajsiuq doxcaeuz ganj guh haenx. Hawj Vangz Bizyiz roxnyinh loeklak dwg, gij najdenz de dajveh haenx ndaej daengz vunz rog guek gyaenzmai, engq youq canjyenj dingzsat le, cungj deng vunz dangdieg yunghe gij gyaqcienz 3000~5000 maenz cawx aeu liux.

Bae Meijgoz dauqma le, Vangz Bizyiz saenqsim saenqhwnj, caemhcaiq giva cwkrom 30 fan najdenz cauhnduj le, banh gij canjlanj najdenz baengzgyoeb bouxvunz. De maqmuengh doenggvaq bonjfaenh roengzrengz, ndaej hawj engq lai vunz yawjaen caeuq roxyiuj gij gyaendei gij huq fwngz guh conzdungj ndawbiengz youq ndaw ndwenngoenz cwkrom roengzdaeu haenx.